

富平县志

一
函
十
册
函

富平縣志稿卷六

人物傳下

孝行

喬洛大牛村人事父母色養備至鄉鄰無間言江邑侯開以孝思維則表其門

黨元煦永潤堡人孝行素著母歿日泣柩次定省饗殮如生不解衰絰及葬後每夜宿墓旁無室廬寢苫塊雖大風雪亦如之

侯夢桂五歲失怙未嘗讀書及稍長爲人僱每得錢必潔酒饌以供母四時蔬果先入市者見必購歸奉母囊橐空宴如

也夫婦嚴冬嘗覆以毛單而母室必極溫光緒元年母九十餘桂六十每至門輒大聲呼母藹然如赤子口吻二年母歿桂亦悲鬱成疾旋歿桂西鄉侯家堡人母氏張

張得福西鄉南張堡人六歲失恃及長學賈山右之祁縣事繼母蒙氏每得異味必先進而後食一生貿易獲利多寡錙銖必進之母偶託人致銀信誤投福岳家其妻私之不使母知後福歸廉得其故妻檣首服罪終身不齒母病福親伺湯藥衣不解帶者數月

田闊西鄉橫坡村寇堡人事母曹以孝聞曹病服藥無效闊割左中指二節入藥病遂愈後月餘復發歿闊哀毀骨立鄉

鄰共稱之

雷慎言字銘三新移里人監生端重寡言笑事親以孝聞咸豐元年陝甘學政慎奏賜建坊銀又以養志遺風表之在到賢鎮

雷慎行字震芝慎言弟居家孝友處鄉寬厚遇荒年出粟賑饑里人公立德行碑於到賢鎮東門外

樊有爵字補臣原名廷一任奎文閣典籍齊羅堡人植品端方以孝友處家庭至老彌篤好施濟精岐黃

馮成泰縣西北覓子鎮人性慈良孝行篤摯親歿廬墓里黨稱之

車敬年十七讀書於外母邵病敬日讀書晚歸視湯藥往反
十餘里百餘日不倦母歿居喪盡禮髮逆至率衆守欽仁堡
保全甚多素知醫年八十四猶耳目聰明步履如壯時四世
同居其重孫安定聘妻蕭氏年十七遇髮逆不辱投井自盡
王德修字懋齋庠生事母孝訓蒙別村數日必歸省夜侍母
寢年五旬猶依依膝下如童時母歿苦塊三年未入內室
王學寬字容夫通關里人事母盡孝養每事必稟命出告反
面居恆以孝友訓族人及鄰里光緒丁丑奇荒饑殍不繼奉
母甘旨餅餌無少缺母病篤醫藥靡治中夜乞藥於大堡村
觀音堂廟門扃鍵拔鑰卽啟焚香跪禱天明持藥歸飲母疾

尋愈與弟學德學儒同處怡怡無間言懦弱冠入邑庠

來文鰲來家圪塔人性至孝家貧僱工養母夏日母檢柴石
川河灘山水陡發河漲漂母去文鰲急從崖際躍入水逐波
里許母子無恙人咸謂至孝感神闔聯人等獎以孝行可風
匾額時道光十年也

任錫爵素孝母病不能起兼有目疾便溺不知錫爵恐母惡
其臭常以手代箕箒家貧無錢買眼藥自以舌舐母目歲饑
得食卽供母母令其遠方求食勿以己爲念錫爵弗忍竟同
母餓死

惠思聰乳名臨子富平縣東鄉惠堡人生未周歲父大有遠

客新疆三十餘年無音耗光緒十年邑人有自伊犁歸者遇之金河城西大河沿互詢里族喜甚勸之偕歸大有辭以乏資問有書寄家否大有歎息言已離家時妻王氏年方少子臨子生纔數月家無資業復連遭兵燹存歿均不可知卽有書將誰付也其人旣歸造門訪之臨子自爲兒時頻向母索父母告以父在萬里外且不知栖跡之所則涕泣不飲食至是聞邑人言益悲號銳欲往尋母泣阻之驟對曰大河沿誠在天上耶兒肉身不能飛至信矣如亦在地上何爲不可至哉母奇其言然終不聽去其妻懲舅姑前事牽挽尤力竟絕襟而行至縣城念母愛己之深慮其思之過而致疾也復反

告曰兒至縣適有神卜某君以奇門法爲兒占行止言今歲西行福星臨護大吉無阻難兒意決矣母亦勿憂言已徑負裝西去不返顧時十年八月十九日也值秋霖彌月冒雨至蘭州衣袴盡黢爛有大賈見而憐之攜至肅州臨子遂獨行出關冬杪至瑪瑙河自河壩抵西湖沮洳四百餘里冰雪積五六尺行人皆墮指裂膚臨子車裘俱無短衣徒步卒無凍容十一年正月始抵伊犁大河沿訪得其父居次趨入跪父前捧足而號父愕然圓拒之臨子哭告所自且縷述家事顛末父始收悲喜陝人客伊犁者爭來問訊華夷兵民皆以九千餘里徒步尋父爲古未有事遠近咸稱爲惠孝子自是孝

名徧聞南北入城間大河沿以牧爲生哈薩爾回部有盜奪大有之牛者防兵爲捕追百餘里取牛歸大有曰奈何攘孝子物二月金軍譁變殺掠甚慘臨子負父逃出兵士詢知乃大呼曰勿傷惠孝子遂得免亂旣平佃種芝蔴罌粟苦力勤作所獲倍人積數十金以償父宿債卽治歸裝是處兵民亦醵資贖焉於九月擇日起程旋里十二年正月父子偕至家王氏出視夫婦竟不相識大有泣然曰此我臨行時少婦乎今髮皤皤一婆嫗矣大有寓宅在大河沿有一榆樹大踰百圍自臨子歸後土人相戒勿剪折其枝咸稱爲孝子樹云

論曰生人無立傳之說志書成田生培塿膺採訪役以惠

思聰出塞尋親事略見示余驚且喜曰

國初蘇人黃孝子向堅尋親於滇南歸三吳人士艷稱之計
先生甫拜向堅於牀下終身師事之甯都魏叔子爲之作
傳蔡九霞先生且言幾不敢執筆爲置論孝子自繪萬里
尋親圖名流爭題詠焉端木先生爲讀書論道之儒而思
聰一田家子耳乃能篤天親之愛奮身戎馬間短衣蹻蹻
於冰雪中卒得安然奉父歸里門豈非天誘其衷能如是
哉詩云孝子不匱永錫爾類其傳也不亦宜乎

忠節

郭濬字磨園火家原人官戶部河南司兼湖廣司員外郎意

富平縣志卷六
王
氣恢宏慷慨篤友誼丁外艱旋里適奉

諭旨命在籍縉紳舉行團練濬與邑侯江開籌商堵禦繕城郭完
器械集壯勇回逆之變嘗以百餘騎扼賊於盤龍灣又以數
十騎薄賊於竇村皆獲勝同治二年正月初四日賊突逾荆
原焚掠村寨時濬病新瘳授士卒方略命掩擊之尋懼有誤
遂偕高陵生員楊櫓禦賊於阜茨村賊衆卒有憚色濬大呼
進衆始振殲賊渠數人賊援四至衆寡不敵遂遇害楊櫓亦
死焉賊遁昇濬屍鱗傷徧體貌如生士庶環觀爲之下泣先
是濬以軍功

賞戴藍翎擢知府未奉行知而戰亡舉人何文蔚李澄等具呈

申請由縣府司道轉詳蒙

恩准在本籍建立專祠春秋致祭給予雲騎尉世襲同時陣亡之

附生楊櫓一併附祀

師中吉科子村人附貢生同治元年八月回逆擾村焚室廬
去生出窖救廬賊復至生持矛巷戰賊招之降生大罵遇害
張仲敏武循鼎從九武立功壬戌回亂俱以團防禦賊死

生員范元清龍崗人性爽俊多智略能詩有怡心集未梓回
逆亂起猝合鄉團曉以大義爲防守計元年八月三十日賊
大至與楊生集二百餘人拒賊於城西二生督團丁力戰賊
死者亦近百後以衆寡不敵二人皆被執不屈元清妻劉氏

子爾標妻田氏聞元清被殺皆投火自焚巡撫邵題奏奉

旨以雲騎尉世襲

生員楊元杰有聲庠序回逆亂與同村范元清合團拒賊衆
敗被執不屈其妻何氏聞夫被害卽自縊巡撫邵題奏奉

旨以雲騎尉世襲

鹽知事銜楊廷棟龍崗堡人同治元年八月三十日拒賊身
死其妻劉氏弟婦翟氏偕五女珠蘭川蘭蕙姐哲姐九蘭等
皆投屋後井死

從九品銜楊懋德與廷棟拒賊戰歿其妻韓氏亦罵賊被殺
陳柏齡字壽臣孝弟力田性直有胆力鄉人敬畏邑令李公

嘉其義子農官同治初回逆亂時年七十壯心未已倡修堡城爲守禦計賊驟至率衆巷戰以衆寡不敵遂遇害

師夔龍師場科子村人義勇戰亡於三原夕陽鎮

師鴻瑞科子村人義勇戰亡於邑東定國寺

保正賈元東甯堡人團首王思進鍾秀堡人鄉約吳煥秀清甯堡人與壯士王經同治元年五月十九日率團禦賊戰亡於高陵陂西鎮

團首袁林謝村團庄人同治元年六月三十日率領鄉團禦回於荊原勇潰林亡

高啟偉高李堡人同治初回逆亂率團禦賊於荊園賊羣至

衆寡不敵戰亡

馬鎮海東鄉馬堡人壯年英武胆勇過人同治壬戌邑令江
開募勇防賊教習陣法惟鎮海稱幹率勇禦回於賀家原呂
村原南原戰皆全勝次年正月初四日阜角樹之戰賊馬甚
衆勇奔北鎮海身被重圍鬪半日殺二十餘人力竭被害
李元浩寶村人王奎阜角樹人皆有勇力同治元年訓練鄉
勇定國寺禦回至八月率勇戰於皇甫村深入重圍血戰多
時雖被殺而殺賊亦無算

喬正明喬永義房王正同治元年六月三十日回逆焚掠三
人執矛肩背相依與賊巷戰傷一賊賊虜至不敵遂遇害

劉煥章竹園人同治元年八月二十七日回逆至章巷戰力竭被執不屈死

袁耀宗老南社人禦賊被害

武懷慶中和堡人壬戌八月逆回犯南社慶用矛刺賊賊麕集戰死

呂長齡西鄉壽陽堡人精拳勇胆略過人同治元年五月十三日回逆初叛團練大臣張公芾遇害於渭南之油房街勢甚猖獗漢民大懼長齡曰回逆舉動焚掠而已非有大志然戀家室百里之外每夜必歸與回鄰者非剪除害必重及其未渡河時急清除近穴則彼來無所主席無支蔓之虞矣時

前耀州知州王諷金鎖都司阿揚阿聞長齡齊團俱來請助
長齡倡首西鄉十餘聯隨之幾萬人十五日至耀州凡近城
二里之寺溝堡三十里之韓家原逆數百家一日平之故遭
亂一來富平西北鄉與耀州輕於他處長齡力也二十六日
賊攻三原城幾陷時知三原縣事余庚颺前署富平有惠政
民感之長齡曰余公吾父母也願報德隨吾往援復集團者
千餘人馳至城下與賊接戰自辰至申賊始退殺賊數百人
而長齡亦於是日陣亡同日死者西十二聯王興文邵繼奎
唐永和張沐張汝琪張五雲張鵬翮邵富齡邵雙兒邵永祿
楊年楊天祿胡振之陳廷訓胡來兒胡放心胡雙保胡三益